


Tertib Surah	Nama Surah	Bilangan Ayat	Bilangan Ruku'	Makkiyyah / Madaniyyah	Tertib Turun	Bilangan Paragraf
Ke-31	Luqman	34	6	Makkiyyah	Ke-57	4



Zaman Diturunkan

Surah Luqman dan Surah al-'Ankabut diturunkan di permulaan tahun ke-5 Kenabian sebelum berlakunya hijrah ke Habsyah pada bulan Rejab tahun ke-5 Kenabian. Di dalam surah ini, anak-anak muda yang baru memeluk Islam diperintahkan supaya melayani dengan baik kedua ibu bapanya yang musyrik. Dalam keadaan mereka berusaha menarik kepada kesyirikan pula, mereka tidak boleh ditaati.

Perkaitan Surah Luqman Dengan Surah Sebelum Dan Selepasnya

Di dalam Surah ar-Rum, dikemukakan dalil-dalil tauhid dan dalil-dalil adanya hari kemudian, di dalamnya juga terdapat berita gembira akan mendapat kemenangan dan pertolongan dalam peperangan Badar. Di dalam Surah Luqman ini, syirik dikatakan suatu kezaliman yang sangat besar, manusia disuruh bersyukur dan mengelak diri daripada pemujaan terhadap nenek moyang. Di dalam Surah Luqman terdapat beberapa nasihat bernas oleh Luqman, ia sebenarnya menggambarkan sifat-sifat orang mu'min. Di dalam Surah as-Sajdah akan datang juga dinyatakan sifat-sifat orang mu'min di samping dinyatakan perbezaan di antara orang mu'min dan orang fasiq. Antara sifat orang mu'min ialah mereka bertasbih memuji tuhan di samping bertahajjud pada waktu malam, selain itu mereka merendah diri, takut kepada Allah dan percaya akan bertemu dengan tuhan di akhirat kelak.

Beberapa Kata Kunci Dan Tema Utama Surah

1. Allah s.w.t. bersifat حَكِيم (bijaksana), kitab suci yang diturunkan kepada Nabi Muhammad juga bersifat حَكِيم. Segala ujian di dunia dan segala sistem balasan baik dan buruk yang akan berlaku di akhirat nanti juga berasaskan hikmat.

(a) Allah s.w.t. bersifat dengan حَكِيم (Ayat: 9).

وَهُوَ الْعَزِيزُ الْحَكِيمُ ①

(b) Kitab Allah juga bersifat dengan sifat حَكِيم (Ayat: 2).

وَلَكَ آيَاتُ الْكِتَابِ الْحَكِيمِ ①

(c) Luqman juga telah diberikan hikmat yang membawanya bersyukur kepada Allah (Ayat: 12).

وَلَقَدْ آتَيْنَا لُقْمَانَ الْحِكْمَةَ أَنْ اشْكُرْ لِلَّهِ

(d) Balasan berupa syurga dan neraka juga berasaskan hikmat (Ayat: 7-9).

2. Di dalam surah ini diperintahkan manusia bersyukur, hasil daripada perasaan syukur itulah lahir aqidah tauhid, syukur adalah sifat hamba-hamba Allah yang setia.

(a) Allah s.w.t. telah memberi hikmat kebijaksanaan kepada Luqman di mana Allah memerintahnya

supaya bersyukur kepada Allah (Ayat: 12).

(b) Syukur adalah satu sifat yang berguna kepada manusia itu sendiri (Ayat: 12).

وَمَنْ يَشْكُرْ فَإِنَّمَا يَشْكُرُ لِنَفْسِهِ

(c) Manusia yang tidak bersyukur dan tidak setia hanya ingat kepada Allah pada waktu ditimpa musibah, tetapi hamba Allah yang bersyukur dan setia pula adalah orang-orang yang sentiasa ingat kepada Allah (Ayat: 32).

3. Di dalam Surah Luqman manusia dinasihati supaya mengelak diri daripada pemujaan kepada nenek moyang, mereka diseru supaya memilih jalan tauhid.

(a) Jika kedua ibu bapa memaksa anak-anaknya melakukan kesyirikan maka mereka pun tidak boleh ditaati, bagaimanapun mereka hendaklah dilayani dengan baik dalam kehidupan di dunia ini (Ayat: 15).

وَإِنْ جَاهِدَاكَ عَلَىٰ أَنْ تُشْرِكَ بِي مَا لَيْسَ لَكَ بِهِ عِلْمٌ فَلَا تُطِعْهُمَا وَصَاحِبُهُمَا فِي الدُّنْيَا مَعْرُوفًا

(b) Orang-orang musyrikin diminta supaya mengikut al-Qur'an, sebagai jawapannya mereka berkata: "Kami hanya akan mengikuti jalan yang dipilih oleh nenek moyang kami" (Ayat: 21).

وَإِذَا قِيلَ لَهُمْ اتَّبِعُوا مَا أَنْزَلَ اللَّهُ قَالُوا بَلْ نَتَّبِعُ مَا وَجَدْنَا عَلَيْهِ آبَاءَنَا

(c) Pada hari kiamat nanti, anak tidak dapat membela ayah, begitu juga sebaliknya. Kerana itu manusia hendaklah mengelak diri daripada pemujaan kepada nenek moyang, mereka sebaliknya hendaklah memikirkan masa depan sendiri (Ayat: 33).

وَأَخْشَوْا يَوْمًا لَا يَجْزِي وَالِدٌ عَنْ وَلَدِهِ وَلَا مَوْلُودٌ هُوَ جَارٍ عَنْ وَالِدِهِ شَيْئًا

4. Di dalam surah ini diberikan beberapa dalil tentang Allah sebagai خَالِق (pencipta) dan manusia diminta supaya menerima tauhid uluhiyyah.

(a) Allah adalah pencipta langit-langit (Ayat: 10).

خَلَقَ السَّمَوَاتِ بِغَيْرِ عَمَدٍ تَرَوْنَهَا

(b) Orang-orang musyrikin dicabar dalam bentuk soalan, mereka ditanya: "Adakah مِنْ دُونِ اللَّهِ (selain Allah) telah mencipta apa-apa?" (Ayat: 11).

هَذَا خَلْقُ اللَّهِ فَأَرُونِي مَاذَا خَلَقَ الَّذِينَ مِنْ دُونِهِ

(c) Orang-orang musyrikin menerima Allah sebagai pencipta tetapi mereka melakukan syirik dalam ibadat dan ketaatan (Ayat: 25).

وَلَيْنَ سَأَلْتَهُمْ مِّنْ خَلْقِ السَّمَوَاتِ وَالْأَرْضِ لَيَقُولُنَّ اللَّهُ

(d) Menjadikan manusia semua sekali dan menghidupkan mereka kembali, bagi Allah sama sahaja dengan menjadikan seorang manusia (Ayat: 28).

مَا خَلَقَكُمْ وَلَا يَغْنُكُمْ إِلَّا كَنَفْسٍ وَاحِدَةٍ

5. Di dalam surah ini juga terdapat dalil-dalil tauhid ilmu yang bererti hanya Allah jua mempunyai ilmu yang sempurna dan lengkap, ilmu seperti itu tidak ada pada sesiapa pun selainNya.

(a) Luqman telah membuat suatu perbandingan kepada anaknya dalam membuktikan tauhid ilmu dan tauhid qudrat Allah. Allah mengetahui secara mendalam segala perkara, apa-apa yang tersembunyi di langit, mahupun di bumi walaupun sebesar biji sawi diketahui Allah semuanya dan Allah juga berkuasa membawanya keluar. Itu juga merupakan dalil adanya hari kemudian (Ayat: 16).

يَبْقَىٰ إِنَّهَا إِن تَكُ مِثْقَالُ حَبَّةٍ مِّنْ خَرْدَلٍ فَتَكُنْ فِي صَخْرَةٍ أَوْ فِي السَّمَوَاتِ أَوْ فِي الْأَرْضِ يَأْتِ بِهَا اللَّهُ إِنَّ اللَّهَ لَطِيفٌ خَبِيرٌ ﴿١٦﴾

(b) Allah s.w.t. Maha mengetahui, Dia mengetahui segala rahsia yang tersimpan di dalam dada manusia (Ayat: 23).

إِنَّ اللَّهَ عَلِيمٌ بِذَاتِ الصُّدُورِ ﴿٢٣﴾